

陸士龍集

陸士龍集目錄

卷一

賦箴

逸民賦

逸民箴

歲暮賦

愁霖賦

喜霽賦

登臺賦

南征賦

寒蟬賦

卷二

詩

四言失題前八章後一章

征西大將軍京陵王公會射堂皇太子見

命作此詩

大將軍宴會被命作此詩

太尉王公以九錫命大將軍讓公將還京

邑祖錢贈此詩

太安二年夏四月大將軍出祖王羊二公

於城南堂皇被命作此詩

贈顧驃騎後二首

從事中郎張彥明爲中護軍

贈汲郡太守

卷三

詩

兄平原贈

答

贈鄭曼季往返八首

鄭答

陸贈

鄭答

陸贈

鄭答

陸贈

鄭答

贈顧尚書

贈顧彥先

答顧秀才

答大將軍祭酒顧令文

答吳王顧處微

贈鄴陽府君張仲膺

孫顯世贈

答

卷四

詩

失題二首

答兄平原二首

爲顧彥先贈婦四首

答張士然一首

笑藥

卷五

吳故丞相陸公誄

晉故散騎常侍陸府君誄

晉故豫章內史夏府君誄

卷六

頌

登遐頌

盛德頌

祖考頌

張二侯頌

榮啓期讚

嘲褚常侍

牛責季友

卷七

騷

九愍

修身

涉江

悲郢

行吟

紆思

考志

感逝

征

卷八

與平原書

卷九

啓

國啓西國第表啓

西園第既成有司啓

王卽位未見賓客羣臣又未講啟

與駕比出啓

言事者啓使部曲將司馬給事覆校諸官

財用出入啓

國人兵多不法啓

卷十

書集

與朱光祿書

與張光祿書

與嚴宛陵書

嚴宛陵答

與戴季甫書 七首

與楊彥明書 七首

與陸典書書 七首

附車茂安書

答車茂安書

車茂安又答書

弔陳永長書 五首

弔陳伯華書 二首

移書太常府薦張瞻

陸雲傳

唐太宗御撰

陸雲字士龍六歲能屬文性清正有才理少與兄機齊名雖文章不及機而持論過之號曰二陸幼時吳尚書廣陵閔鴻見而奇之曰此兒若非龍駒當是鳳雛後舉雲賢良時年十六吳平入洛機初詣張華華問雲何在機曰雲有笑疾未敢自見俄而雲至華爲人多姿制又好帛繩纏鬚雲見而大笑不能自己先是嘗著縵經上船於水中顧見其影因大笑落水人救獲免雲與荀隱素未相識嘗會華坐華曰今日相遇可勿爲常談雲因抗手曰雲間陸士龍隱曰日下荀鳴鶴鳴鶴隱字也雲又曰旣開青雲覩白雉何不張爾弓挾爾矢隱曰本謂是雲龍駸駸乃是山鹿野麋獸微弓強是以發遲華撫手大笑刺史周浚召爲從事謂人曰陸士龍當今之顏子也俄而公府掾爲太子舍人出補浚儀令縣居都會之要名爲難理雲到官肅然下不能欺市無二價人有見殺者主名不立雲錄其妻而無所問十許日遣出密令人隨後謂曰其去不出十里當有男子候之與語便縛來旣而果然問之具服云與此妻通共殺其夫聞妻得出欲與語憚近縣故遠相要候於是一縣稱其神明郡守害其能屢譴責之雲乃去官百姓追思之圖書形象配食縣社尋拜吳王晏令中令晏於西園大營第室雲上書曰云云時晏信任部將使覆察諸官錢帛雲又陳曰云云雲愛才好士多所貢達移書太常府薦同郡張瞻曰云云入爲尚書郎侍御史

太子中舍人中書侍郎成都王穎表爲清河內史穎將討齊王冏以雲爲前鋒都督會同誅轉大將軍右司馬穎晚節政衰雲屢以正言忤旨孟玖欲用其父爲邯鄲令左長史盧志等並阿意從之而雲固執不許曰此縣皆公府掾資豈有黃門父居之邪玖深忿怨張昌爲亂穎上雲爲使持節大都督前鋒將軍以討昌會伐長沙王乃止機之敗也并收雲穎官屬江統蔡克東嵩等上疏曰統等聞人主聖明臣下盡規苟有所懷不敢不獻昨聞教以陸機後失軍期師徒敗績以法加刑莫不謂當誠足以肅齊三軍威示遠近所謂一人受戮天下知誠者也且聞重教以機圖爲反逆應加族誅未知本末者莫不疑惑夫爵人於朝與衆共之刑人於市與衆棄之惟刑之恤古人所慎今明公興舉義兵以除國難四海同心雲合響應罪人之命懸於漏刻泰平之期不旦則夕矣機兄弟並蒙拔擢俱受重任不當背罔極之恩而向垂亡之寇去泰山之安而赴累卵之危也直以機計慮淺近不能董攝羣帥致果殺敵進退之間事有疑似故令聖鑒未察其實耳刑誅事大言機有反逆之徵宜令王粹牽秀檢校其事令事驗顯然暴之萬姓然後加雲等之誅未足爲晚今此舉措實爲太重得則足令天下情服失則必使四方心離不可不令審諦不可不令詳慎統等區區非爲陸雲請一身之命實慮此舉有得失之機敢竭愚懇以備誹謗穎不納統等重請穎遲迴者三日盧志又曰昔趙王

殺中護軍趙浚赦其子驤驤詣明公而擊趙卽前
事也蔡克入至穎前叩頭流血曰雲爲孟玖所怨
遠近莫不聞今果見殺罪無彰驗將令羣心疑惑
竊爲明公惜之僚屬隨克入者數十人流涕固請
穎惻然有宥雲色孟玖扶穎入催令殺雲時年四
十二有二女無男門生故吏迎喪葬清河修墓立
碑四時祠祭所著文章三百四十九篇又撰新書
十篇並行於世初雲嘗行逗宿故人家夜暗迷路
莫知所從忽望草中有火光於是趣之至一家便
寄宿見一年少美風姿共談老子辭致深遠向曉
辭去行十許里至故人家云此數十里中無人居
雲意始悟却尋昨宿處乃王弼冢雲本無玄學自
此談老殊進雲弟耽爲平東祭酒亦有清譽與雲
同遇害大將軍參軍孫惠與淮南內史朱誕書曰
不意三陸相攜聞朝一旦湮滅道業淪喪痛酷之
深荼毒難言國喪僞望悲豈一人其爲州里所痛
悼如此後東海王越討穎移檄天下亦以機雲兄
弟枉害罪狀穎云

陸士龍文集卷第一

晉 吳郡陸 雲著
明 新安汪士賢校

賦箴

逸民賦并序

富與貴人之所欲也而古之逸民或輕天下細萬物而欲專一丘之歡擅一壑之美豈不以身勝於宇宙而恬貴於紛華者哉故天地不易其樂萬物不干其心然後可以妙有生之極享無疆之休也乃爲賦云

世有逸民今栖遲於一丘委天形之外心兮淡泊然其何求陋此世之險隘兮又安足以盤遊杖短策而遂往今乃枕石而漱流載營抱魄懷元執一傲物思寧妙世自逸靜芬響於永言滅絕景於無質相荒土而卜居度山阿而考室曾丘翳莽穹谷重深叢木振穎葛藟垂陰潛魚泳沚嚶鳥來吟仍疏圃於芝薄兮卽蘭堂於芳林靡炎颺以赴節兮揮天籟而興音假樂器於神造兮詠幽人於鳴琴挹迴源於別沼兮食秋菊於高岑蒙玉泉以濯髮今臨濬谷而投簪寂然尸居儼焉山立遵渚龍見在林鳳戢遁綿野以宅心望空巖而凱入明發寤歌有懷在昔賓濮水之清淵兮儀磻溪之一壑毒萬物之誼譁兮聊漁釣於此澤爾乃薄言容與式宴盤桓朝挹芳露夕玩幽蘭眇區外而放志兮眷天路而怡顏望靈嶽之清景兮想佳人於雲端悲滄浪之濁波兮詠芳池之清瀾鄙終南之辱節兮

肆伯陽之考槃眄清霄以寄傲兮泝淩風而頽歎玄微載晏何思何欲漂若行雲之浮泊若窮林之木客有得之必喪兮蓋居龐之名辱彼貪夫之死權今固遺生以要祿竦戰兢而履冰兮祗肅懷以臨谷亮據鼎之無慄兮在顛沛其必渥是故夫形魂者徵咎體壯者爲犧雖明文而龍藻兮終俛首而受羈立修名於禍始兮登全生於戾階資朝華之促節兮抱千載之長懷擗考終於遠期兮韻靈根而自摧殉有喪之假樂方無身其孰哀美達人玄覽兮逸藏器於無爲物有自遺道無不可萬殊有同齊物無寡並家於國等朝于野榮在此而貴身今神居形而忘我欽妙古之達言兮信懷莊而悅賈憎既明於天爵兮何憒於人禍陋國風之皇恤同明哲於大雅亂曰乘白駒兮皎皎遊穹谷兮藹藹尋峻路兮崢嶸臨芳水兮悠裔槃丘園兮暇豫翳翠葉兮重蓋瞻洪崖兮清輝紛容與兮雲際欲凌霄兮從之恨穹天兮未泰詠歡友兮清唱和爾音兮此世

逸民箴

余昔爲逸民賦大將軍掾何道彥大府之俊才也作反逸民賦盛稱官人之美寵祿之華靡偉各位之大寶斐然其可觀也夫名者實之賓位者物之寄窮高有必顛之吝溢美有大惡之尤可不慎哉故爲逸民箴以戒反正焉
浩浩太素制爲兩儀經始君臣朝有俊弼野有逸民各有攸居而後品物有倫在昔后帝齊物達觀

賞不假爵教不示勸號謚莫設而生黎淳晏降迄
中古黃象可觀而唐文有煥乃彫乃藻大樸既散
樸之既散萬百熙心形爲寵放神爲利淫有翹者
車命彼在林是故懷玉喪寶而被褐解襟恬亡智
生與世或競匪智無鑒匪心伊鏡芒芒禹迹鞠爲
塗徑惟是每懷偏彼反正正反於寵既尸干祿相
協厥居而豐其屋祿之既尸刑爲爾司屋之既豐
喪家于宮故非據之災戒之在凶人皆知存之爲
存而莫知得之爲喪榮猶振穎墜若頽荒谷自專
寵福在循牆是故保其安者常危而忘其存者不
亡無休爾榮身寔親名無謂爾崇神期好冲戒彼
覆餗冒此棟隆慎微如顯乃保身以終自古在昔
逸民有作相彼宇宙方之委爲夫豈無不休而好
是冲漠是故名利之災至人攸恪謂予未信無寧
監于桑霍天明既畏神道無親善在求己慶由積
仁無念爾本聿修厥淳執盈如虛乃反天真逸民
司正敢告官人

歲暮賦 并序

余祇役京邑載離永久永寧二年春忝寵北郡其
夏又轉大將軍右司馬於鄴都自去故鄉荏苒六
年惟姑與姊仍見背棄銜痛萬里哀思傷毒而日
月逝速歲聿云暮感萬物之既改瞻天地而傷懷
乃作賦以言情焉

夫何乾行之變通今昏明迭而載路羨飛轡之遠
御今騰六龍於天步時赴節而漸流今氣移數而
改度揮促節於短日今振修策於長夜運攸忽其

既周今歲冉冉而告暮變棘心之柔風今滋豐草
之湛露玄暉邈以峻服今黃裳皓而振素於是顯
項御時玄冥統官天廟既底日月貞觀淪重陽於
潛戶今徵積陰於司寒日回天以滅景今馳衡淵
而無瀾堅冰涸於川底今白雪隕於雲端普區宇
之瘁景今頻萬物之衰顏時稟戾其可悲今氣蕭
索而傷心淒風愴其鳴條今落葉翻而灑林獸藏
丘而絕迹今鳥攀木而栖音山振枯於曾嶺今民
懷慘於重襟寒與暑其代謝今年冉冉其將老豐
顏曄而朝榮今玄髮粲其夕皓感芳華之志學今
悲時暮而難考遠圖逝而辭懷今密思集而盈抱
羨厚德之溥載今嘉豐化之大造恨盛來之苦晏
今悲衰至之常蚤指晞露而怵心今衍死生於靡
草蒙時來之嘉運今遊上京而凱入委乘輅於紫
宮今剖金虎而底邑憑台光之發暉今荷寵靈而
來集望故疇之迴遠今沂南風而頽泣長歎息而
永懷今感逝物而傷悲哀年歲之攸往今伊行人
之思歸結隆思於朝日今綴永念於紀暉表寸陰
而貞吝今盼盈尺其若遺嗟我行之久永今何歸
途之茫茫憩運渚於□川今眴攸逝於江湖處孝
敬於神丘今結祗慕於惟桑瞻山川而物存今思
六親而人亡問仁姑而背世今及伯姊而淪喪尋
餘蹤於空宇今想絕景於遺堂悲山林之杳藹今
痛華構之丘荒靖深情以遐慕今思纏綿而懷楚
涕垂頤以交頰今哀凌心而洞駭神尋路而寢迹
今形嘯蹙乎其所心悠悠其若懸今音既絕而復

舉悲人生之有終兮何天造而罔極仰悲谷之方
中兮顧懸車而日昃百年迅於分曄兮千歲疾於
一息詠大椿之萬祀兮同蟪蛄於未識歲難停而
易逝兮情艱多而泰寡年有來而棄予兮時無算
而非我祇生心於日順兮雖呼翕其難假攝賦生
於逆旅兮欲淹留其焉可彼鑒寐之有時兮亦始
卒之固然舒遠懷於千載兮悵同感乎中山鑒通
人之炯戒兮懼晏平之達言啓貞心以自責兮覽
遺籍而問道亮爽鳩之既徂兮故營丘之有紹在
吾儕之陋心兮豈取樂於東表苟長生而自得兮
將奚待而有天考大德於天地兮知斯言之益矯

愁霖賦

永寧三年夏六月鄴都大霖旬有奇日稼穡沉湮
生民愁瘁時文雅之士煥然並作同僚見命乃作

賦曰

在朱明之季月兮反極陽於重陰興介丘之膚寸
兮墜崩雲而洪沉谷風扇而攸遂兮苦雨播而成
淫天決滌以懷慘兮民嘖蹙而愁霖於是天地發
揮陰陽交激萬物混而同波兮玄黃浩其無質雷
憑虛以振庭兮電凌牖而輝室霽鼎沸以駿奔兮
潦風驅而競疾豈南山之暴隣兮將冥海之颺溢
隱隱填填若降自天高岸渙其無崖兮平原蕩而
爲淵遵渚回於凌河兮黍稷仆於中田匱多稼於
億廩兮虛風敬於祈年外薄郊甸內荒都城陰無
晞景霽無輟聲纖波靡於前途兮微津隔於峻庭
紛雲擾而霧塞兮漫天頽而地盈於是愁音比屋

歎發屢省陽堂乏暉朗室無景望曾雲之萬仞兮
想白日之寸脛感虛無而思深兮對寂漠而言靖
毒甚雨之未晞兮悲夏日之方永瞻大辰而頽息
兮仰天衢而引領愁情沉疾明發哀吟永言有懷
感物傷心結南枝之舊思兮詠莊鳥之遺音羨弁
彼之歸飛兮寄予思乎江陰渺天末以流目兮涕
潺湲而沾襟何人生之倏忽痛存亡之無期方千
歲於天壤兮吾固已陋夫靈龜矧百年之促節兮
又莫登乎期頤哀戚容之易感兮悲懼顏之難怡
考傷懷於衆苦兮愁豈霖之足悲雲曇曇而疊結
今雨淫淫而未散晞朱陽於崇朝兮悲此日之屢
晏劾豐隆於岳陽兮執赤松於神館命雲師以藏
用兮繼乘龍於河漢照濛汜之清暉兮炳扶桑之
始旦考幽明於人神兮妙萬物以達觀

喜霽賦

余既作愁霖賦雨亦霽昔魏之文士又作喜霽賦
聊廁作者之末而作是賦焉

毒霖雨之掩時兮情懷憤而無懌肅有禱於人謀
今反極陰于天津靖屏翳之洪隧兮戢太山之觸
石凌風絕而謐寧兮歸雲反而揮霍改望舒之離
畢今曜六龍於紫閣揚天步之剡剡兮播靈輝之
赫奕於是朱明自皓凱風來南復火正之舊司兮
黜后土於重陰夷中原之多潦兮反高岸於嵩岑
萎禾疎而振穎兮偃木豎而成林嘉大田之未墜
兮幸神祇之有歆爾乃俯順習坎仰熾重離兼明
暢而天地曄兮羣生悅而萬物齊魚淩淵以增躍

今鳥望林而朝濟哉流波於枉水兮起芳塵於沉
泥朱光播於瓊牖兮素景衍乎中閨天監作照幽
明畢觀普厥有懽覃及四國翕萬情而咸喜兮雖
無獲而自得災未及害和斯有祥翼翼黍稷油油
稻糧望有年於自古兮唏隆周之萬箱原思悅於
蓬戶兮孤竹欣於首陽陰陽交泰萬物方適炎神
送暑素靈迎秋四時逝而代謝兮大火忽其西流
年冉冉其易頽兮時靡靡而難留嗟沉哀之愁思
今瞻日月而增憂感年華之行暮兮思乘煙而遠
遊命海若以量津兮吾欲往乎瀛洲臨儀天之太
川兮凌懷山之洪波瞻增城之峻極兮仰蓬萊之
峨峨望王母於弱水兮詠白雲之清歌雖嘉命之
未錫兮將輕舉於流沙振仙車之鳴鸞兮吐玉衡
之八和託芝蓋之後乘兮淪瓊林之朝華修無窮
以容與兮豈萬載之足多

登臺賦

永寧中參大府之佐於鄴都以時事巡行鄴宮三
臺登高有感因以言崇替適作賦云

承后皇之嘉惠兮翼聖宰之威靈肅言而述業兮
乃啓行乎北京巡華室以周流兮登崇臺而上征
攀凌砥而遂躋兮迄雲閣而少寧爾乃佇眎瑤軒
滿目綺寮中原方華綠葉振翹嘉生民之豐豐兮
望天畀之若若歷玉階而容與兮憇蘭堂以逍遙
蒙紫庭之芳塵兮駭洞房之迴飈頽嚮逝而迄物
兮傾冠舉而凌霄曲房榮而窈眇兮長廊邈而蕭
條於是趨路季夷遠宇玄芒深堂百室曾臺千房

闢南牕而蒙暑兮啓朔牖而履霜遊陽堂而冬溫
今步陰房而夏涼萬禽委蛇於潛室兮驚鳳矯翼
而來翔紛譎譎於有象兮邈攸忽而無方于時南
征司火朱明鬱遂縣車式徐曜靈西墜暑乘陰而
增炎兮景望淵而曖昧玩瓊宇而情廢兮覽八方
而思銳陋雨館之常規兮鄙鳴鵠之蔽第仰凌眄
於天庭兮俛旁觀乎萬類北溟浩以揚波兮青林
煥其興蔚扶桑細於毫末兮崑崙卑乎覆簣於是
忽焉俛仰天地既翕宇宙同區萬物爲一原千變
之常鈞兮齊億載於今日彼區中之側陋兮非吾
黨之一室本達觀於無形兮今何求而有質於是
聊樂近游薄言儻佯朝登金虎夕步文昌綺疏列
於東序朱戶立乎西廂經鞋曄以披藻兮椒塗馥
而遺芳感舊物之咸存兮悲昔人之云亡憑虛檻
而遠想兮審曆命於斯堂於是精疲游倦白日藏
輝鄙春登之有情兮惡荆臺之志歸聊弭節而駕
言今悵將逝而徘徊感崇替之靡常兮悟廢興而
永懷隆期啟而雲升逝運靡其如頽長發惟祥天
鑒在晉肅有命而龍飛兮跼重斯而肇建嘉有魏
之欽若兮鑒靈符而告禪清文昌之離宮兮虛紫
微而爲獻委普天之光宅兮質率土之黎彥欽哉
皇之承天集北顧於乃眷誕洪祚之遠期兮則斯
年於有萬

南征賦 并序

太安二年秋八月奸臣羊玄之皇甫商敢行稱亂
凌逼乘輿天子蒙塵于外自秋徂冬大將軍敷命

羣后同恤社稷乃身統三軍以謀國難自義聲所及四海之內朔漠之表蒸徒羸糧而請奮胡馬歎塞而思征四方之會衆以百萬軍旅之威威靈之著自古已來未之有也粵十月軍次于朝歌講武治戎以觀兵于殷墟於是美義征之舉壯師徒之盛乃作南征賦以揚匡霸之勳云爾

有皇晉之霸后資濬哲之睿聖崇文德於緝熙濟武功而保定應天鑒之昭華荷帝祐之休命步王衡以觀八方在璇璣而齊七政芒芒神道化洽崇深印戾天飛俯洞淵沉振南箕以鼓物冒慶雲而崇蔭恢天維以籠世廓宇宙而宅心濟博施之厚德鏗希聲之大音淵澤回而泣注豪彥萃而爲林九服惟清諸夏謐靜肅慎回首沙漠引領天和時降地靈夙挺結芳林之奇幹發珍禾之神穎勵修德於億兆端澄形於萬景在中葉之不競遭皇家之毒亂悲國步之未夷仰夙興而昧旦括無方而大誥集率土而貞觀致天屬於王畿肅宵征而省難爾乃建黃鉞之靈威樹戎輅之高蓋伐隱天之雷鼓振凌霄之電旆介夫揮戈而夙興輕武總于而啓葛振靈韶之嘈嘈飛旗旄之藹藹虹旂沂風以委蛇霓旄蒙光而容裔公徒十萬其會雲興悠悠華戎時罔不承爾乃命屏翳以夕降式飛廉以朝升塗蒙雨而復清景帶天而光澄陪武臣於彫軒列名僚於後乘猛將起而虎嘯商飈肅其來應士憑威而嚮駭馬獻天而景凌臨川屯於廣陸武騎被乎中陵類禡比京師徒經始桓桓先征在河

之涖順彼長道懸旌千里羨王師之遵時茂七德而發止爾乃稅駕殷墟我徒旣閑順時講武薄狩于原紛同方而類聚煥副翼而明分祗明刑以奮衆習軍政於舊聞儼山立以崇蒼紫烟駭而興紛若冥海之弓回流岱靈之吐行雲于時玄冬首時陰風戒煞山澤含哀天地肅又閑夜列以澄清中原曠而曖昧戎士肅而咸戒三軍紛而雜遝長角哀叫以命旅金鼓隱訇而啓伐景淩冥而四播音乘雲而上逝火烈具舉伐鼓淵淵朱光俛而丹野炎暉仰而絳天曜靈翕赫以增熾憤氣拂悅而淩烟狂飈起而妄駭行雲藹而芊眠旌旆翻其猗靡驚燦因而嬋娟爾乃洪音雷瀆清問剋廣淩雲發揮萬里振響聲馮虛而天回烈駭而地蕩映皓月而望舒闇照重昏而大夜朗服縣炎揚而晃儻飛烽戢煜而泱泱乃有熊羆之旅虓闕之將雄聲泉涌逸氣風亮超三軍以奔厲賈餘勇而成壯北洪音於寂冥先無形而高唱紛若屯雲渙若積波遁陰匿景靜言勿譁絕倡寂其旣收萬夫翕而咸和嚴鼓隱而重戒景燧曄而星羅烈蒙陰而仰假曜憑陽而登遐若扶桑之振華葉皓天之散朝霞超燭龍之絕景豈比象於百華

寒蟬賦并序

昔人稱難有五德而作者賦焉至於寒蟬才齊其美獨未之思而莫斯述夫頭上有綬則其文也含氣飲露則其清也黍稷不食則其廉也處不巢居則其儉也應候守節則其信也加以冠冕取其容

也君子則其操可以事君可以立身豈非至德之
虫哉且攀木寒鳴貧士所歎余昔僑處切有感焉
興賦云爾

伊寒蟬之感運迺嘉時以游征含二儀之和氣稟
乾元之清靈體貞精之淑質吐噀噬之哀聲希慶
雲以優遊遁太陰以自寧於是靈岳幽峻長林參
差爰蟬集止輕羽涉池清澈微激德音孔嘉承南
風以軒景附高松之二華黍稷惟馨而匪享竦身
希陽乎靈和唳乎其音翻乎其翔容麗蜩蟬聲美
宮商颺如飛焱之遺驚風眇如輕雲之麗太陽華
靈鳳之羽儀睹皇都乎上京跨天路於萬里豈蒼
蠅之尋常爾乃振修綏以表首舒輕翅以迅翰挹
朝華之墜露含煙煨以夕飡望北林以鸞飛集穆
木以龍蟠彰淵信於嚴時稟清誠乎自然翩眇微
妙綿蠻其形翔林附木一枝不盈豈黃鳥之敢希
唯鴻毛其猶輕憑綠葉之餘光哀秋華之方零思
鳳居以翹竦仰竚立而哀鳴若夫歲聿云暮上天
其涼感運悲聲貧士含傷或歌我行永久或詠之
子無裳原思嘆於蓬室孤竹吟於首陽不銜草以
穢身不勤身以營巢志高於鳴鳩節妙乎鳴鵲附
枯枝以永處何瓊林之迥脩惟雨雪之霏霏哀北
風之飄颻既乃彫以金采圖我嘉容珍景曜爛曄
曄華豐奇侔黼黻艷比衰龍清和明潔羣動希蹤
爾乃綴以玄冕增成首飾纓綈翩紛九旒容翼映
華虫於朱戟表馨香乎明德於是公侯常伯乃紆
紫轂執龍淵俯鳴珮玉仰撫貂蟬飾黃廬之多士

光帝皇之待人既騰儀像於雲闥望景曜乎通天
邁休聲之五德豈鳴雞之獨珍聊振思於翰藻闡
令問以長存於是貧居之士喟爾相與而俱嘆曰
寒蟬哀鳴其聲也悲四時云暮臨河徘徊感北門
之憂殷嘆卒歲之無衣望泰清之魏峨思希光而
無階簡嘉蹤於皇心冠神景乎紫微詠清風以慷
慨發哀歌以慰懷

陸士龍集卷第一

陸士龍集卷第二

晉 吳郡陸 雲著

明 新安汪士賢校

詩

四言失題

前八章後八章

悠悠縣象昭回太素清濁迭興升降啓度遺和既
爽季春告暮朱明來思青陽受煦

其二

日征月盈天道變通大初陶物造化爲功四月惟
夏南征觀方凱風有集飄飄南窗思樂萬物觀異
知同

其三

有淪萋萋甘雨未播黍稷方華中田多稼庭槐振
藻園桃阿那薄言觀物在堂知化

其四

蓬戶惟清玩物一室明發有懷念昔先哲通夢幽
人彷彿遺烈清暉在天孰與永日

其五

乃啓遺籍思予大觀幽居傲物顧景怡顏況惟解
舞衡門重關思媚古人有懷良盤沉曦含輝芳烈
如蘭

其六

厥初生民有物有類自古有稱大寶以位征徒式
好俊奔攸遂啟予有聞誨爾達貴

其七

達貴伊何天爵無榮渾淪大昧混其濁清毀方遜

象遺頑履貞道寶藏器景以昭形

其八

芒芒陋世奚競奚錯牧彼紛華委之冲漠漂志垂
天矯心馮閣通好莊聃儀形有作安得達人顧予
命薄

其一

思樂芳林言采其菊衡薄遵塗中原有菽登彼修
巒在林寤宿彷彿佳人清顏如玉

其二

予美亡此誰爲適道容與俟之玄髮方皓躑躅山
阿玩此芳草願餐其穎庶以遺老

其三

疊疊嘉時飄忽棄予有瞻逝深永嘆潛濟登願扶
桑仰結飛晷伊人匪存遺芳孰與

其四

精氣爲物或降或升徂落攸往神奇有登死生爲
徒存亡曷勝謂予不信遺籍有徵

其五

閒居外物靜言樂幽繩樞增結夔牖綢繆和神當
春清節爲秋天地則爾戶庭已悠

其六

嗟我懷人悠悠其潛念昔先烈有懷所欽駭情玩
世堂允南金瓊輝邈矣誰適爲心明發興言慷慨
芳林

征西大將軍京陵王公會射堂皇太子見
命作此詩

芒芒大極玄化烟煴頽形成器凌象垂文大鈞造
物庶類羣分先識經始實綜彝倫

其二

惟岳隆周生甫及申天監在晉祚之降神邈矣遐
風茂德有隣永言配命唯晉之鎮

其三

厥鎮伊何實幹心膺文教內輔武功外禦淮方未
靖帝曰攸序公于出征奄有南浦

其四

南海既賓爰戢干戈桃林釋駕天馬婆娑象齒南
金來格皇家絕音協徽宇宙告和

其五

玄綱峻極天罔既紘文武方升允茲兼弘峨峨高
夏有肅其涼公侯戾止駉驥龍驤善問如林在會
鏘鏘

其六

祝融銜節火正緝熙凱風徘徊萬物欣時秩秩初
筵薄言在茲嘉福介祐萬壽無期

大將軍宴會被命作此詩

皇皇帝祐誕隆駿命四祖正家天祿保定叡哲惟
晉世有明聖如彼日月萬景攸正

其二

巍巍明聖道隆自天則明分爽觀象洞玄凌風叶
極絕輝照淵肅雍往播福祿來臻

其三

在晉奸臣稱亂紫微神風潛駭有赫茲威靈旗樹

施如電斯揮致天之居于河之沂有命再集皇輿
凱歸

其四

頽綱既振品物咸秩神道見素遺華反質辰晷重
光協風應律函夏無塵海外有謚

其五

芒芒宇宙天地交泰王在華堂式宴嘉會玄輝峻
朗翠華崇藹冕弁振纓藻服垂帶

其六

祁祁臣僚有來雍雍薄言載考承顏下風俯覲嘉
客仰瞻王容施己唯約于禮斯豐天錫難老如岳
之崇

太尉王公以九錫命大將軍讓公將還京
邑祖餞贈此詩

烈文辟公時惟哲王闡縱絕期平顯幽光內實慎
徽緝熙有臧出紂方慝間督不揚高山峻極天造
芒芒

其二

天子念功大典光備肅肅王命宰臣莅事穆矣淵
讓遺功遂志思我遠猷徽音孰嗣

其三

后命既靈王人反旆興言出租飲錢于邁旌旆決
泱軺軒藹藹和風弭塵清暉映蓋

其四

思樂中陵言觀其川公王戾止有車轡轡伊誰云
饗我有嘉賓羽觴舉酬酢爾征人

其五

悠悠征人四牡駢發軫北京振策紫微昔乃云
來春林方輝歲亦暮止之子言歸道途興戀伏載
稱微

其六

聖澤既渥嘉會愔愔庭旅鐘鼓堂有瑟琴飛鸞清
暉扶桑移蔭親景祇慕揮袂沾襟變彼同栖悲爾
異林我有旨酒以歌以吟

大安二年夏四月大將軍出租王羊二公

於城南堂皇被命作此詩

時文唯晉天祚有祥聖宰作弼受言既臧有赫斯
庸勳格昊蒼景物台暉棟隆玉堂

其二

惟常思庸大興光迪聖敬遠濟神道玄邈思媚三
靈誕膺天篤嘉命既辱王人言告

其三

翼翼主人言告惟慕公與駕言乃眷斯顧華旂飛
藻鳴鸞振路駢駢壯嘯天載步

其四

我有高廈如雲斯蒼彫軒戾止薄言嘉會問誰在
宴惟俊惟又豐俎殷薦獻酬交泰

其五

攸攸昊天南正興言朱明有暉萬葉翠繁昌雲垂
天凱風熙顏王臣在此貽宴于懽

其六

懸象西頽虞淵納景嘉樂未晞嚴駕已整行矣征

人身垂路永飛驂顧懷華蟬引領遺思北京結轡
臺省

贈顧驃騎後二首

有皇美祈陽也祈陽秉文之士駿發其聲故能明
照有吳入顯乎晉國人美之故作是詩焉

有皇大晉時文憲章規天有光矩地無疆神篤斯
祐本顯克昌載生之雋實惟祈陽哲問宣猷考茂
其相

其二

於鑠祈陽誕鍾天篤清輝龍見玄猷淵嘿沉機響
駭幽神廣觀和以同人歸物時育有大惡盈謙以
自牧思我懿範萬民來服

其三

吳未喪師天秩有庸淵哉若人弱冠休風俯翼黃
門以德來忠端秀蕃后正色儲宮徵音鑠穎邈矣
遐蹤

其四

皇惟南終舊邦匪敢委弁釋位如龍之潛考槃穹
谷假樂豐林子雖藏器鐘鼓有音惠風往敬慶問
來尋

其五

濟濟元公相惟天子明明辟王思隆多士帝曰欽
哉有命集止我咨四方令問在爾以朕大賚乃膺
嘉祉聿來胥步觀國之紀

其六

惟皇建極緝熙清曜我有俊民明德來照大觀在

上主假有廟顯允顧生金聲玉振之子于升利見
大人龍輝絕跡有肅清塵

其七

清塵既彰朝虛好爵敬子侯度慎微百辟予聞有
命德禮不易嗟我懷人瞻言永錫豐祐東法惟子
之績

其八

遵汶涉泗言告同征勁風宵烈湛露朝零雲垂藹
下泉冽清泠哀哉行人感物傷情從子京邑言觀
厥成天保祚德式穀以寧

思文美祁陽也祁陽能明其德刑于寡妻以至於
家邦無思不服亦賴賢妃貞女以成其內教故作
是詩焉

思文祁陽祁陽克峻天錫淳嘏宣茲義問德音既
烈海外有奮既奮斯音祇敬厥德照治其家覃及
邦國永肇儀刑俾民惟則

其二

文王在上太姒思齊魯侯克昌亦賴令妻鑒神有
顧蘋蘩在斯祁陽載天作之伉儷

其三

在虞之胄實惟有姚穎艷玉秀華茂桃夭居顯祇
明在靈格幽清塵熠燿淑心綢繆爰及祁陽惟德
之周

其四

其德伊何和貞虔告師民履素言謀慮度鐘鼓思
樂靖端風效考休攸嬪來嫁于顧

其五

羔羊執贄玉帛有輝百兩集止之子于歸宗姻風
從娣姪雲回祁陽顧之煥其盈闈

其六

既曰歸止式揚好音言觀河洲有集于林思樂葛
藟薄采其蕞疾彼攸遂乃孚惠心

其七

惠心既孚有恪中饋敦此衆斯永錫嗣類載延窈
窕用和寤寐神之聽之胤祚來爾

其八

昔周之隆有任有姒內刑聖教外崇多士今我淑
人實亮君子疊疊翼翼亦繼斯祉宜爾子孫福祿
盈止

從事中郎張彥明爲中護軍

并敘

奚世都爲汲郡太守客將之官大將軍崇賢之德
既遠而厚下之恩又隆非此離析有感聖皇既蒙
引見又宴于後園感鹿鳴之宴樂詠魚藻之凱歌
而作是詩

思文有聖叡哲配天功濟生黎道合上玄休命發
揮有集惟賢哲彼寤宿澄此在淵

其二

濟濟多士實播令聞王曰欽哉余嘉乃勳徽音孔
碩惠爾風雲穆此芳烈肇揚清芬

其三

肅肅庶僚袞服寵暉肇被桃蟲假翼翻飛出撫邦
家入翔紫微有命既集願言永違

其四

思樂華堂雲構崇基公王有酒薄言饗之景曜微
芒芳風詠時宴爾賓儋具樂于茲

其五

疊疊我王豐恩允藏我客戾止飲酒公堂自彼下
僚聿來有光悲矣永言指塗逝將形違殿闔景附
華房

其六

開國承家勿用小人今我聖宰實蕃斯仁凌淵龍
躍披林鳳振正直既好嘉禮式陳振我遠德歸于
時民

贈汲郡太守

於穆皇晉豪彥實蕃天罔振維有聖貞觀鳴鳥在
林良駿卽閑萃彼俊乂時亮庶官

其二

抑抑奚生天篤其淳芳穎蘭揮瓊光玉振沉機照
物妙思考神思我善問觀德古人

其三

善問伊何惠音孔韶肇允衡門翻飛宰朝肅雍芳
林芬響凌霄穆矣和風育爾清休

其四

亦既有試出宰邦家之子于行民固謳歌風澄俗
儉化靜世波芒芒旣庶且樂于和

其五

我有好爵旣成爾服入贊崇華遂登帷幄時文聖
宰天祚方穀朔風微止鴻漸雲嶽

其六

悠悠斯民三代直道我求明德惟奚攸考緝熙暉
章天祿來保惠心無競豐化有造

其七

樂只君子茂德攸綏嗟我懷人式是言歸聿言來
集如翼斯揮日子不惠照爾清暉

其八

職思旣殊亦各有司念我同僚悲爾異事之子之
遠悠悠我思雖無贈之歌以言志

陸士龍集卷第二

